

Chattar chavazzins per ragiundscher böts

Leta Steck es statta ot ons activa i'l parlamaint grischun

In gün es per Leta Steck-Rauch (pld, Ramosch) l'ultima sessiun sco commembra dal Grond cussagl. Davo duos periodas d'uffizi a Cuaira s'allegra ella d'avair daplü temp eir per activitats na politicas.

La carriera politica da la disegnadura e manadra da fabrica Leta Steck-Rauch ha cumanzà da maniera classica: Avant ün decenni d'eira ella gnüda eletta illa suprastanza cumünala da Tschlin. L'interess pella politica vaivan svaglià seis genituors. «Ma eir meis magisters a Zernez m'han dat sün via quist interess», as regord'la. Ün da quels d'eira Jacques Guidon: «Eir sch'eu nu d'eira adüna da listess avis co el, vaina adüna gnü fich bunas discussiuns.» Da l'on 1997 es ella gnüda ad abitar cun sia famiglia a Martina.

Activitats per cumün e regiun

Sper sia lavur sco planisadra e manadra da fabrica ha Leta Steck s'ingeschada eir divers ons sco commembra da la suprastanza dal cumün da Tschlin. Ella faiva part eir dal cussagl da scoula. «In quels ons, amo avant la fusiun al cumün da Valsot, vaina fundà il consorzi da scoula cullas scoulas da cumün da Tschlin, Strada, Martina e Ramosch.» Quistas activitats a favur dal cumün e da la scoula tilla satisfavian, «i's pudai-va far alch per promover il svilup d'ün cumün ed eir d'üna regiun.» Da l'on 2000 es Steck gnüda eletta i'l Güdisch districtual. Desch ons es ella statta pel parti liberal commembra da quist tribunal. Ün fil cotschen in sia actività poli-

tica es la prouva da chattar soluziuns chi satisfan a plüssas parts: «Eu n'ha adüna provà d'unir ideas divergentas e da chattar ün chavazzin per realisar ün proget o ragiundscher cumünavelmaing ün böt.»

Pitschen pass illa politica chantunala

Cur cha Victor Peer vaiva demischüna da l'on 2010 sco grond cusglier es Leta Steck gnüda dumandada sch'ella vess interess da d'vantar successura. Causa seis plaschair per activitats politicas sün nivel regional ha ella dit da schi ed es eir gnüda eletta quel on. «Il möd da lavurar in ün parlamaint es naturalmaing tuot oter co quel ch'eu d'eira adüsada fin qua», disch la politica, «id es üna lavur importanta per cumüns e chantun, ella düra però enormamaing lösch.» Quai cuntrafà, sco cha Leta Steck disch, ün pa a seis esser: «Sco in meis manster lessa ragiundscher böts, fabricar e verer la saira il resultat concret. Illa lavur parlamentara invezza as vegna minchatant ün pa malpazchaint.» Ch'ella haja adüna lavurà pella chosa, as basond sün sias experiencias i'l sector da sandà, ch'ella ha ramassà sco vicepresidente dal Center da Sandà Engiadina Bassa ed i'l sector da scoula. «In quists ot ons vaina ragiunt differents böts, ma eir blers böts be parzials, i sun adüna s-chalins chi'd es da tour ün davot schel», manzuna Leta Steck.

«Ils contacts persunals mancan»

Seis plü grond success i'l Parlamaint chantunal es, sco cha Leta Steck disch, ch'ella haja chattà uraglias attentas a Cuaira, tant illa fracziun sco eir i'l Grond cussagl: «Scha nus gnivan cun üna proposta o ün'opiniun schi vaina adüna chattà bun'udientscha», con-

stat'la, «nus vain pudü metter i'l ra- vuogl dal parlamaint tscherts terms. Il- las trattativas culla Viafier retica per exaimpel vaina pudü persvader ultima- maing als respunsabels da laschar circu- lar eir amo tard trens chi mainan ils au- tos tras il tunnel dal Veraina.» Davo ot ons i'l Parlamaint chantunal es Steck da l'avis chi saja bun schi gnian activas a Cuaira otras persunas cun otras ideas ed oters möds da lavurar. «Eu svesa nu less mancantar gnanc'ün di da la lavur

sco grond cusglia», accentuesch'la, chi saja stat fich interessant e ch'ella haja pudü imprendere a cugnoscher blera glied. Chi poss'esser chi man- ran plü tard ün pa ils contacts culs col- legas. «Ma uschigliö m'allegre eau uossa d'avair ün pa daplü temp liber, i'l sen chi's po avair sül chalender eir ün pèr fouras e na adüna tuot planisà», disch Leta Steck-Rauch, «e quellas fouras im- plischa lura cun ir culs skis, far passlung ed oter.» (anr/fa)



La deputada Leta Steck-Rauch da Strada maina il büro da la firma Fanzun SA a Scuol. fotografia: Flurin Andry